



HIMAGSIK

Rebolusyonaryong Pahayagan ng Gitnang Luzon

Taon XXIX Blg. 1

REGULAR NA ISYU

Enero-Pebrero 2003

Editorial

Ibagsak ang Pasistang Rehimeng US-Arroyo!

Hindi deklarado ang batas militar sa bansa subalit laganap ang pasismo dulot ng patakarang todong gera ng rehimeng US-Arroyo. Ginagamit na lisensya ni GMA sa walang habas na pandarahas sa mamamayan ang pagkakabansag ng kanyang imperyalistang amo sa Partido Komunista ng Pilipinas, Bagong Hukbong Bayan at mga kilalang personahe at lider nito bilang mga “terorista”.

Pangunahing nakatuon ang todong gerang patakaran ng rehimeng US-Arroyo sa rebolusyonaryong kilusan at sa lahat ng mga progresibong organisasyong nagsusulong ng lehitimong interes ng mamamayan. Arbitraryong binabansagang terorista o tagakandili ng terorista ang sinumang sumasalungat sa kanyang mga kontra-mamamayang patakaran. Bunsod nito, kabi-kabila ang krimen ng mersenaryong AFP, PNP, Cafgu at iba pang grupong “vigilante” at paramilitar sa mga mamamayan sa kanayunan man o kalunsuran.

Sa pagitan ng Enero 2001 hanggang Enero 2003, naitala ng mga organisasyon para sa karapatang tao at naiulat sa Amnesty International ang 172 biktima ng pagpatay, 127 biktima ng tortyur, 879 biktima ng pag-aaresto at pagkulong, 9,219 biktima ng ng pambobomba at pamamaril, 11,179 biktima ng paninira ng ari-arian at 17,564 biktima ng sapilitang pagpapalikas.

Sa rehiyon, ang pinakahuling kaso ng pagpatay ay ang pagmasaker ng mga elemento ng 24th IB sa isang anim-kataong pamilya kasama ang apat na bata sa Sitio Palis, Brgy. Magisgis, Botolan, Zambales.

Umiigting din ang pandarahas ng militar sa mga ligal at demokratikong pagkilos ng mamamayan sa rehiyon: Sa Tarlac, tinambakan ng 150 pinagsanib na mga elemento ng 312nd at 313rd PNP Regional at

Provincial Mobile Groups, 703rd Infantry Brigade at 69th IB, at mga *intelligence* ang paligid ng Central Azucarera de Tarlac (CAT) habang nakawelga ang mga manggagawa nito.

Nauna rito, pinasok din ng dalawang trak ng sundalo mula sa 69th IB ang *compound* ng International Wiring System (IWS) sa loob din ng Luisita Industrial Park noong nasa kasagsagan ang welga ng mga manggagawa nito. Sunud-sunod na operasyong militar sa mga baryong saklaw ng Hacienda Luisita ang anyo naman ng pananakot na ginawa sa mga manggagawang bukid na lumalaban para sa dagdag na araw ng trabaho, dagdag sahod at benepisyo

Sa Pangasinan, tinambakan ng isang kumpanyang militar mula sa 48th at 71st IB ang buong paligid ng San Roque Dam. Pinaratangang rekruter ng NPA ang mga mag-aaral ng Univer-



sity of the Philippines (UP) gayundin ang Tignay Dagiti Mannalon A Mangwaya-waaya Ti Agno (TIMMAWA), isang organisayon ng mga mamamayan sa paligid ng dam na nangangampanya ng pagpapatigil sa nasabing proyekto.

Tinambakan at kinampuhan naman ng may 250 pinagsanib na elemento ng PNP-Tayug at Regional Mobile Group (RMG) galing La Union ang loob ng planta ng La Tondena Distillers Inc. sa Sta. Barbara, Pangasinan nang nagsimula ang welga ng mga manggagawa nito. Kasapakat nila ang mga bayarang goons sa limang mararahas na pagbuwag sa piketlayn, paniniktik at pananakot sa mga manggagawang lumalahok sa welga.

Sa Baloc, Sto. Domingo, Nueva Ecija, pinaputukan ng mga *goons* ng isang panginoong maylupa (PML) ang mga magsasakang tumututol sa pangangamkam ng naturang PML sa kanilang lupang sinasaka. Ang pagpapaputok na ito ay hindi inaksyunan ng mga militar na nakakampo malapit sa pinaglalabanang lupa. Sa buong Nueva Ecija, laganap din ang pagpapatupad ng *curfew*.

Tuluy-tuloy ang pagsasagawa ng mga *spot checkpoint* sa ilang mayor na ruta sa rehiyon bago pa isagawa ang mga *checkpoint* para sa umano'y malawakang kampanya laban sa pagdadala ng baril. Ilan sa mga ito ay ang *spot checkpoint* sa *toll gate* ng Tabang at Sta. Rita sa Bulacan at San Simon sa Pampanga sa kahabaan ng North Luzon Expressway.

Samantala, tuluy-tuloy ang pagdagsa sa rehiyon ng mga sundalong Amerikano para sa umano'y mga magkasanib pagsasanay militar ng mga tropang US at Pilipino sa ilalim ng Balikatan 03-1. Nitong Pebrero 1,

dumating sa Clark ang may 6,000 tropang militar ng US na lalahok sa Balance Piston 03-05. Tulad sa mga naunang Balikatan Exercises, ang panibagong mga pagsasanay militar na ito ay lalong magpapahaba sa listahan ng mga paglabag sa karapatang tao at panliligalig sa buhay at kabuhayan ng mamamayan sa ilalim ng rehimeng US-GMA.

Habang patuloy na lumalala ang kahirapan sa bansa, lalo namang nagiging garapal ang rehimen sa pangungurakot at pagtanggap ng mga suhol. Sa halip harapin ang krisis ng bansa, buong yabang sa pakikipagkoro si GMA kay George Bush para isulong ang digmang agresyon sa Iraq. Wala siyang pakialam kung ilang milyong Iraqi ang mamamatay at mapipinsala, kung ilang milyong manggagawang Pilipinong nasa ibang bansa ang maapektuhan at kung ano ang pinsalang idudulot ng gera ng US sa Iraq sa pambansang ekonomya at sa mamamayang Pilipino.

Mangyari pa, tiyak na gagamitin ng US ang mga pasilidad militar sa Pilipinas para sa gerang agresyon nito. Dahil dito, hindi malayong direktang madamay ang bansa sa gera at manganib ang buhay at kabuhayan ng milyun-milyong Pilipino. Kung magkakagayon, ang bawat malagas na buhay ng inosenteng Pilipino dahil sa gerang ito ay utang na dapat panagutan ni GMA sa sambayanan.

Hindi nababago ang mga batayan para igiit ang pagpapabagsak sa papet, tiwali, inutil at pasistang rehimen ni GMA. Hindi rin nito maikukubli na ang pag-atras nito sa eleksiyong 2004 ay isang maniobra lamang upang makabawi mula sa matarik na pagbulusok ng kanyang popularidad at maiwasan ang panibagong pag-aalsa ng malapad na nagkakaisang prente. Anumang maniobrang gawin ng rehimeng US-Arroyo, hindi ito makaliligtas sa pag-uusig ng sambayanan.

Nakahandang ipalaspas sa rehimen ng buong rebolusyonaryong kilusan sa pamumuno ng Partido Komunista ng Pilipinas ang kabi-kabilang bigwas. Bubuuin ang malalapad na nagkakaisang prenteng anti-pasista upang pakilusin ang pinakamaraming bilang ng mamamayan. Ilulunsad ang malalaking mobilisayong masa at iba't ibang anyo ng kilos-protesta sa mga sentrong bayan at lungsod sa buong bansa.

Sa kanayunan, paiigtingin ang mga taktikal na opensiba ng BHB laban sa mga lehitimong target. Kaalinsabay, ibayong pasisiglahin ang rebolusyong agraryo at pabibilisin ang pagbubuo ng baseng masa at mga lokal na organo ng kapangyarihang pampulitika. Pagbabayaran nang mahal sa pulitika at militar ang rehimeng Arroyo sa terorismo, pagkapapet, katiwalian at pagka-inutil nito. *H*

NILALAMAN

Editorial: Ibagsak ang Pasistang Rehimeng US-Arroyo!	1
Katarungan sa mga Biktima ng Pasismo Susi sa tagumpay ng welga sa Philippine Rabbit	3 5
Bulacan, paralisado ng tigil pasada 69 KVA Transmission, tinutulan ng mamamayan	8 9
Mga pagkilos laban sa ambang gera ng US sa Iraq, para sa kapayapaan	10
Pamilyang Aeta, minasaker sa Zambales Pagpaparusa ng Bulacan-NPA sa 2 opereytor ng quarry	11 12



Katarungan sa mga Biktima ng Lupao Masaker at Pasismo ng Estado

Pebrero 10, 1987. Napatay ng mga nakapusisyong Pulang Mandirigma ang tim lider ng 14th Infantry Battalion na si Lt. Edgar Dizon na nagsasagawa ng patrolya sa sityo Padlao. Matapos ang ilang minuto ay dumating ang *reinforcement* ng mga militar. Nang wala ng abutang mga NPA ay kaagad na binuweltahan ng mga militar ang sityo Padlao, ang pinakamalapit na komunidad sa pinangyarihan ng pananambang.

Galit na galit at walangawang pinagpapaslang ng mga militar ang mga sibilyan sa sityo. Mula sa pinakapaslit na 4-5 taong gulang hanggang sa pinakamatanda ay kanilang pinagpapatay. Iniwang bangkay ng mga berduong militar ang 17 katao; bata, matanda, lalaki at babae.

Ginunita ng abot sa 300 lider magsasaka, manggagawa, kabataan, at mga propesyunal ang ika-16 na anibersaryo ng Lupao Masaker nitong nakaraang Pebrero 10, 2003. Pinangunahan ng mga taong simbahan ang isang misa sa Cathedral ng San Jose City. Matapos ito ay nag-*caravan* ang buong delegasyon patungong Cabanatuan City at nagprograma sa *public market* upang kolektibong bigyang mukha ang patuloy na hikahos na kundisyon ng masa kapwa sa lunsod at kanayunan ng lalawigan na sa halip na bigyang resolusyon ng naghahalinhinang rehimen ay karahasan ang itinutugon.

Labing-anim na taon na ang nakalipas, 22 taong gulang na si Marissa Gante - isa sa mga nalabing humihingang malalalim na pilat ng mga krimen ng mersenaryo ng naghaharing estadong malapyudal at malakolonyal. Estado ng uring panginoong maylupa at burges komprador ang patuloy na nagsasagawa ng marami pang Lupao Masaker at nangdarahas sa marami pang Marissa Gante hindi lamang sa Nueva Ecija kundi maging sa Gitnang Luzon at buong bansa.

Naluklok sa poder ang mga tuta ng imperyalismong US tulad nina Marcos, Aquino, Ramos, Estrada at Macapagal-Arroyo. Gaya ng mga lider na nauna sa kanila ay nagkunwang makabayan at makatao ngunit pulos anti-manggagawa at anti-magsasaka.

Sa basbas nila sumasahol pa ang karahasan ng berdugong AFP. Mga krimeng sa halip na lapatan ng parusa ay binibigyang pabuya. Pinarangalan ng rehimeng Aquino ang napatay na Team Leader ng 14th IB pati na ang mga myembro nito matapos ang masaker sa Lupao. Nilusaw nila ang naturang pormasyon at inilipat ang mga elemento sa iba't ibang yunit ng militar sa pag-aakalang mabubura ang naturang karumal-dumal na krimen.

Magpapatuloy ang ganitong kairalan. Ito lamang ang maaaring asahan ng sambayanang Pilipino sapagkat nasa ubod ito ng sistemang malakolonyal at malapyudal. Dadahasin ng alin mang mangibabaw na rehimen ang lahat ng paggigiit at pagsisikhay ng masang Pilipino sa kanilang makauring interes matiyak lamang ang patuloy na paghahari ng imperyalismong US, burges komprador at panginoong maylupa sa bansa.

Kinakamkam ngayon ang bukirin ng mga magsasakang matagal nang nagsasaka sa Sityo Saranay, Barangay Baloc sa Sto. Domingo at sa Barangay Sta. Lucia sa Bayan ng Licab, at armadong dinadahas ng mga panginoong maylupa. Dinedemolisa at pinalalayas naman ang mga maralitang mamamayan sa Campo Bayanihan sa Gapan City, Barangay Bantog sa Munoz City at marami pang komunidad ng Cabanatuan City.

(sundan sa pahina 4)

Durduri 14, ginunita

“Tanghalin ang kabayanihan ng Durduri 14 at lahat ng mga dakilang martir ng bayan!”

Ito ang naging tema sa sama-samang paggunita ng may 150 katao sa ikalawang taon ng kamatayan ng 14 na Pulang Mandirigmang nasawi sa isang depensibang laban ng mga kasama sa Sitio Durduri 1, Brgy. San Vicente, Sta. Ignacia, Tarlac noong

Enero 15, 2001. Lima sa kanila ay nahuling buhay matapos ang labanan subalit minasaker din ng militar.

Kasama ang masa, pinangunahan ng mga kamag-anak at kaibigan ng mga martir ang isang programa at misang parangal nitong Enero 18 sa mismong pinangyarihan ng laban sa mga martir ng Durduri. *H*

Pinaslang ng mga elemento ng 54th IB-PA sa pamumuno ng isang Col. Inocencio Mangayao ang limang sibilyang mangingisda sa Conversion, Pantabangan noong Oktubre 8, 2001 matapos ang engkwentro ng mga militar laban sa mga BHB sa naturang lugar. Binihag muna nila, tinortyur at saka pinaslang ang mga biktima. Pinalabas nila syempre pa na resulta ito ng isang lehitimong engkwentro.

Dinukot ng magkasanib na elemento ng pulis at militar sina Juan Sario Orcino Jr. at Honorio Ayroso, mga kasapi ng Bayan Muna Party List Nueva Ecija sa

Encarnacion Village, San Jose City noong Pebrero 9, 2001. Hanggang sa kasalukuyan ay hindi sila inililitaw ng mga pasistang militar at pulis.

Samantala, sa dikta ng imperyalismong US, todong giyera ang ipinatutupad ng rehimeng Arroyo sa bansa sa pamamagitan ng Oplan Gordian Knot, National ID system, pagsasabatas ng Anti-Terrorism Bill, *checkpoint* ng pulis at militar sa mga haywey, pagbubuo ng mga grupong paramilitar.

Malalim na pilat ang iniwan ng Lupao masaker at iba pang gaya ng sa Conversion sa Nueva Ecija, Mendiola sa Maynila, Escalante sa Negros

Occidental. Higit pa sa naiwang pilat sa naputol na kanang kamay ni Marissa Gante na hindi na niya kailanman maikukuyom at maitataas bilang kamao. Mabigat ang pananagutan ng rehimeng US-Macapagal-Arroyo sa pagkawala ng matatapat, masisigasig na organisador na gaya nina Ka Johnny at Ka Honorio.

Maliit, matimpi at mas dalisay ang kararaang paggunita ng masaker sa Lupao. Higit pa sa poot ay nakaguhit sa mukha ng selebrasyon ang makauring determinasyong matamo ang makauring katarungan.

Marapat lamang na mabigyang katapusan ang paghahari ng imperyalismong US at matatapat nilang kampon na burges komprador at panginoong maylupa sa lalawigan at buong bansa. Marapat lamang mabigyang katapusan ang pag-iral ng sistemang malakolonyal at malapyudal. Ang katarungan at kinabukasang inaasam ng uring manggagawa at magsasaka at malawak na mamamayang naghihikahos ay makakamit lamang sa pagtatagumpay ng Pambansa Demokratikong rebolusyon. *H*



Susi sa Tagumpay ng Welga sa Philippine Rabbit: Militanteng Pakikibaka

Militanteng pakikibaka, paghawak sa wastong linya ng makauring pakikitunggali sa kapitalista, at pagtataguyod sa wastong taktika ng labanan ang naging susi sa matagumpay na welga ng mga manggagawa sa Philippine Rabbit Bus Line (PRBL).

Higit sa isyu ng sahod at benepisyo, naitaas ng mga manggagawa sa PRBL ang kanilang pakikibaka tungo sa usapin ng pagtatayo at paggigiit ng isang tunay, palaban at makabayang unyon (TPMU) at paglaban sa ilampung taong panunupil at pandarahas ng mapagsamantalang kapitalista – ang pamilyang Paras-Nisce.

Sa tulong ng Nagkakaisang Manggagawa ng Tarlac (NMT) at mga pamprobinsyang tsapter ng Bagong Alyansang Makabayan (Bayan), Bayan Muna, Anakbayan at iba pang progresibong organisasyon ng mamamayan, pinatatag at kinonsolida ng mga manggagawa ng PRBL ang kanilang hanay. Itinakda nila ang militanteng direksyon ng pakikibaka at pinakilos ang buong hanay nila alinsunod dito. Sa gayon, naipagtanggol nila ang kanilang piketlayn laban sa ilang ulit na pagtatangkang pagbuwag dito, nalampasan ang lahat ng maniobra, pananakot at pandarahas ng kumpanya, at naitaguyod ang laban hanggang sa tagumpay nito.

Nagkaroon ng importanteng papel sa laban ng mga manggagawa sa PRBL ang pagtatanggol sa piketlayn at pagsustina nito. Ang piketlayn ang naging ekspresyon ng kanilang organisadong lakas at determinasyon. Nagsilbi rin itong isang paaralan ng kanilang hanay upang mas malalim na maunawaang pwede pala silang humarap nang taas-noo at makipag-usap nang pantay-mata sa kanilang kapitalistang amo. Dito rin nila nagagap nang malalim na ang tunay na lakas at kapangyarihan ng manggagawa ay nagmumula sa kanilang organisadong hanay, hindi sa pakikipagkutsaba at pagpapakumbaba sa kapitalista.

Ang militansya ng mga manggagawa ng PRBL ay umani ng suporta at pagkilala ng mga kalapit na komunidad maging ng ilang lokal na organisasyon ng mga drayber at kapwa manggagawa sa kalapit na terminal ng ibang kumpanya ng bus sa Tarlac. Marami sa mga ito ang nagsimulang humingi ng tulong kung papaano nilang oorganisahin ang sariling hanay upang ipaglaban ang kanilang mga karaingan. Sa gayon, ang militansyang ipinakita ng mga manggagawa ng PRBL ay nakapagbukas ng mga panibagong pinto para sa pag-oorganisa ng TPMU.

Kalagayan ng Manggagawa Bago ang Welga

Ang mga manggagawa sa PRBL ay pinamumunuan ng isang dilawang unyon na nakapailalim sa dilawang pederasyong National Labor Union (NLU-Katipunan). Sa mahabang panahon, ang mga lider nito ay pawang kakutsaba at kontrolado ng

kumpanya. Kasapi ng unyon maging ang mga superbisor, inspektor at yaong mga may pusisyong *managerial*. Dahil dito, nagagawa ng kumpanyang hatiin at kontrolin ang unyon. Sa mahabang panahon, nangibabaw ang kasangilan ng pamilyang Paras-Nisce sa buong PRBL. Agad sinusupil sa pamamagitan ng pananakot, pambubugbog



hanggang pagdukot at pagpatay ang sinumang manggagawang nagtatangkang lumaban.

Ang arawang pasahod sa mga manggagawa ay matagal na nakapako sa P196. Ganito ang pasweldo sa lahat ng nasa *rank and file*, regular man o *casual*, baguhan man o tumagal na ng 15-20 taon sa serbisyo. Labis itong mababa kaysa sa P224.50 minimum na arawang pasahod sa rehiyon batay sa itinatakda ng *regional wage board*. Itinaas na lamang sa P204.50 ang arawang sahod nang magsimulang bumwelo ang

(sundan sa pahina 6)

(Philippine Rabbit... mula sa pahina 5)
militanteng paglaban ng mga manggagawa. Ngunit malayo pa rin ito sa dapat nilang tanggapin dahil hindi pa rin ipinapatupad ng kumpanya ang mga karagdaragang sahod na itinatakda ng *Wage Orders* 6 hanggang 9 o karagdagang P17, P12, P16.50, at P20 sa arawang sahod para sa taong 1999, 2000, 2001, at 2002 ayon sa pakakasunud-sunod.

Patuloy na nilalabag ng PRBL ang mga probisyon ng Collective Bargaining Agreement (CBA) at tumatanggi sa pagbubukas ng panibagong CBA kahit halos isang taon na itong *expired*. Ilan sa mga paglabag ng kumpanya sa nilalaman ng CBA ay:

- * di pagbibigay ng *rice subsidy* sa loob ng dalawang taon
- * di pagreremit ng SSS
- * di pagbibigay ng *tax refund* sa loob ng tatlong taon.
- * di pagbibigay ng *uniform allowance*
- * naaantalang pagbibigay ng 13th month pay
- * di pagbibigay ng mga naipong katumbas na *cash* ng mga di nagamit na *vacation leave*

Mayorya ng mga manggagawa ay sumuporta sa welga. Bukod sa labis na kahirapang dinaranas ng mga manggagawa, ang malawak na suporta sa welga ay resulta ng mga panimulang tagumpay sa pamumuno ng bagong unyon sa mga laban bago pa ang welga.

- * di pagpapatupad ng *wage order* 6, 7, 8, at 9

Sa harap ng kalagayang ito, nanatiling inutil ang dilawang unyon, dahilan upang magpursiging magbuo ng tunay at militanteng unyon ang mga manggagawa pangunahin ng mga nasa *maintenance*. Palihim silang nag-organisa at naghanda para sa lokal na eleksyon ng pamunuan ng unyon noong Abril 2001. Buong tapang nilang hinarap ang mga maniobra't pananakot ng mga Paras-Nisce at ng mga dilawang lider na kakutsaba nito. Resulta, naipanalo nila ang mayoryang pwesto sa pamunuan (pwera ang presidente at bise-presidente dahil sa dayaan). Ang ganitong resulta ay nagpapakita ng malawak na pagtangkilik ng mga manggagawa ng PRBL sa militanteng unyonismo.

Matapos ang eleksyon, kagyat na pinatalsik ang dilawang pederasyon. Binigo ng napalakas na suporta ng mga manggagawa sa kampanyang *disaffiliation* sa dilawang unyon ang tangkang pagpigil dito ng presidente at bise-presidente ng unyon na kapwa tao ng management. Subalit hindi kinilala ng *management* ang bagong tayong unyon. Sa halip, hinaras, kinasuhan at sinuspinde ang mga opisyal ng unyon at mga manggagawang namumuno sa laban.

Kaalinsabay, binarahan ng dalawang dilawang lider ang pag-uusap para sa panibagong CBA, dahilan upang ikampanya ng unyon ang pagpapatalsik sa kanila sa pwesto (impeachment). Mayorya ng mga manggagawa ang pumirma sa *impeachment* ngunit hindi ito kinilala ng DOLE at idineklarang walang batayan.

Bunsod ng mga pangyayari, nagpasya na ang unyon na magpapirma para sa welga.

Ihinanay ang mga batayan ng welga sa apat na pangunahing punto: 1) di pagpapatupad ng dating CBA at pagtanggì sa pagbubukas ng panibagong CBA; 2) di-pagkilala sa unyon at mga lider nito; 3) *union busting* o pagdurog sa unyon; at 4) panghaharas sa mga manggagawa at mga lider sa mga mapayapa at lehitimong pagkilos.

Militanteng Pakikibaka

Mayorya ng mga manggagawa ay sumuporta sa welga. Bukod sa labis na kahirapang dinaranas ng mga manggagawa, ang malawak na suporta sa welga ay resulta ng mga panimulang tagumpay sa pamumuno ng bagong unyon sa mga laban bago pa ang welga. Resulta rin ito ng masikhay na pagpopropaganda at pagkokonsolida ng mga lider ng unyon sa panahong nakikitunggali pa sa mga dilawan. Sa proseso ng pakikipaggitgitan ay naipanalo na ang *pagre-release* ng naaantalang 13th month pay at pagbabalik sa trabaho ng anim na manggagawa at tatlong lider na sinuspinde ng kumpanya.

Nang ipinutok ang welga noong Oktubre 30, 2002 ng umaga, sunud-sunod na binuwag ng mga bayarang *goons* at PNP ang piketlayn sa main terminal (Tarlac), Alaminos at Baguio. Subalit hindi natinag ang mga manggagawa at mapagpasyang itinuloy ang welga. Sa ikalawang araw ng welga, paralisado na ang buong operasyon ng PRBL sa lahat ng 13 istasyon nito. Ito ang kauna-unahang welgang pumaralisa sa buong operasyon ng PRBL sa loob ng mahigit 55 taong pag-iral nito.

Sustinidong naitirik ang piketlayn sa anim na terminal, pangunahin ang mga malalaki. Sa mga lugar na wala o di namintina ang piketlayn,

nanatiling sarado ang mga terminal dahil sa di pagpasok ng mga manggagawa bilang pagsuporta sa welga.

Militanteng hinarap ng mga manggagawa ang lahat ng mga panlilinlang ng kumpanya mapabalik lamang sila sa trabaho. Kabilang dito ang ilang beses na pag-aanunsyo sa ibang terminal na tapos na ang welga gayong nasa kasagsagan pa ito; pakikipag-usap sa Bayan-Tarlac imbes sa mga lider ng unyon upang palabasing Bayan ang promotor ng welga at di ang mga manggagawa. Kaalinsabay ay nagkakat ng intrigang tumanggap na ng milyones ang mga lider ng Bayan-Tarlac kapalit ng pag-aatras sa welga. Ilang beses ding pinakilos ng kumpanya ang mga *non rank and file* laban sa welga at pinagpiket sa harap ng upisina Bayan-Tarlac.

Resulta, tumagal lamang ng halos dalawang buwan ang welga. Naobligang makipagkasundo na sa mga manggagawa ang pamilyang Paras-Nisce. Noong Disyembre 17, 2002, pinirmahan ni Engr. Rivo Nisce, Operations Chief at anak ng may-ari ng PRBL sa harap ng mediator ng National Conciliation and Mediation Board (NCMB) ang Memorandum of Agreement (MOA) na gumagarantiyang ibibigay lahat ng mga kahilingan ng manggagawa.

Ilan sa mga naipanalo ng mga manggagawa:

1. Ipatutupad na ang *wage order* # 9 simula 2003 at ibibigay na ang *back wages* batay sa *wage order* # 6 at #7;
2. Magsisimula na sa taong 2003 ang bagong negosasyon sa CBA. Ang bagong unyon (TPMU) ang pangunahing kaharap (bargaining agent) at siyang tutukoy ng mga kinatawan

- mula sa iba't ibang terminal;
3. Ibibigay na rin ang *tax refund*, *rice subsidy* at ang *Vacation leave* na *refundable* sa *cash*. Lahat ay ibibigay sa loob ng unang hati ng 2003;
4. Kagyat na ibibigay pagkatapos ng welga ang kalahati ng 13th *month pay* at ang matitira ay dapat maibigay bago Marso 2003;
5. Ibibigay ng buo at di hulugan ang *retirement* at *optional retirement benefit* batay sa kwentahang 23 araw kada taong serbisyo;
6. Walang anumang ikakaso sa mga manggagawa at iaatras lahat ng mga ikinaso sa mga lider na nanguna sa welga;
7. Ang SSS ay nauna nang naipanalo habang nakawelga. Mabilis na binayaran ng kumpanya ang kontribusyon sa SSS ng mga manggagawa nang masilipan sila ng mga manggagawa kaugnay dito;
8. Ibabalik sa trabaho ang anim na lider ng unyon na tinanggal at kagyat na maglunsad ng *marathon hearing* (mabilisang pagdinig) ng kanilang kaso sa NLRC sa loob ng isang buwan. Sa panahon ng pagdinig, tatamasahin nila ang kanilang dating sweldo, benepisyo at mga karapatan bilang empleyado; at
9. Rebyu ng kaso ng mga manggagawang sinuspindi at tinanggal sa mga nauna pang paglaban.

Mga Kinakaharap na Hamon

Batid ng mga manggagawa ng PRBL na hindi magtatapos sa MOA ang kanilang laban. Ang

Tangan nila ang mayamang karanasan mula sa pinakamasaklaw at pinakamatagumpay sa welga sa buong kasaysayan ng PRBL at sa buong rehiyon. Ang mga aral na ito'y magsisilbi nilang inspirasyon upang higit na magkonsolida at paghandaan ang mga darating pang laban.

pagpupuspos ng kanilang tagumpay ay nakabatay sa kagyatang pagpapatupad ng mga naipanalo nilang kahilingan, lubusang pagwawaksi sa mga dilawan, at pagbabalik sa trabaho ng lahat ng mga tinanggal at sinuspindeng manggagawa.

Likas na katangian ng mga kapitalistang tulad ng Paras-Nisce na tumalikod sa mga kasunduan. Nitong Enero pa lamang, marami nang ginawang maniobra ang kumpanya upang makaiwas sa mga pananagutan nito sa mga manggagawa at bweltahan ang mga ito. Tampok dito ang paggamit sa ilang dating lider at kasapi ng Bagong Hukbong Bayan (BHB) upang kausapin at takutin ang ilang lider at kasapi ng unyon.

Ngunit hindi magtatagumpay ang anumang pakanang isasagawa ng kumpanya dahil patuloy na sasandig sa militanteng pakikibaka ang mga manggagawa ng PRBL. Tangan nila ang mayamang karanasan mula sa pinakamasaklaw at pinakamatagumpay sa welga sa buong kasaysayan ng PRBL at sa buong rehiyon. Ang mga aral na ito'y magsisilbi nilang inspirasyon upang higit na magkonsolida at paghandaan ang mga darating pang laban. *H*

Bulacan, paralisado ng tigil pasada

Paralisado ang byahe ng mga dyipni at traysikel sa Bulacan nitong Pebrero 24 bilang protesta sa CleanAir Act at panawagan para sa kabuhayan, kagalingan at karapatan ng mamamayan. Isandaang porsyentong tigil pasada ang byahe ng mga dyipni at traysikel sa 15 bayan, 95 % sa Baliwag at 90% sa buong Sta Maria. Isandaang porsyentong paralisado naman ang byahe ng mga dyip at traysikel sa kahabaan ng Cagayan Valley Road na sakop ng lalawigan ng Bulacan gayundin ang byahe ng mga FX sa Bocaue, Malolos at Tabang, Guiguinto.

Tinaguriang *Araw ng Protesta, Tigil-pasada, Sama-sama sa Kalsada* ang nabanggit na protesta na pinamunuan ng Dyipni-Tricycle Bulacan Transport Organization (Distributor), Bagong Alyansang Makabayan-Bulacan at Bayan Muna-Bulacan. Kauna-unahang magkasanib na tigil pasada ito ng mga dyipni at traysikel sa lalawigan. Marubrob ang naging pagtugon dito ng mga drayber at iba pang mamamayan. Tigil pasada nang 100% ang mga dyipni at tricycle sa mga bayan ng bayan ng Malolos, Hagonoy, Calumpit, Bulacan, Paombong, Plaridel, Pulilan, Mecauyan, Bocaue, Balagtas, Guiguinto, San Miguel, Norzagaray, Sapang Palay, Pandi; at sa kabayanan ng Sta Maria. Bilang pagsuporta at pagkilala, sinuspindi ng mga meyor at administrador ng mga eskwelahan ang klase sa mga bayan ng Sta Maria, Malolos, Paombong, Hagonoy, Calumpit, Mecauyan at Guiguinto. Samantalang nagpahayag din ng kanilang suporta ang mga drayber ng German Espiritu.

Ayon sa magkasanib na pahayag ng Distributor, Bayan-Bulacan at Bayan Muna-Bulacan, pabalatbunga lamang ang sinasabi ng guberno na ang Clean Air Act ay naglalayong bawasan ang polusyon sa hangin. Nilalaman ng CAA ang hindi pagbibigay ng prangkisa o permisong makatakbo sa lansangan ang mga

sasakyang hindi papasa sa *smoke emission test*. Ang mga *two-stroke* na motorsiklo at karamihan ng mga dyip na gumagamit ng krudo ay hindi na papayagang makatakbo dahil ito ay mausok at nakakadumi sa sariwang hangin. Kung gayon, *phase out* o pagtanggap sa mga dyipri at traysikel ang tunay na layunin ng CAA. Resulta nito, mawawalan ng trabaho ang daan-daang libong drayber, masasayang ang milyun-milyong halaga ng makina, lulubha ang krisis sa transportasyon at maaapektuhan ang hanapbuhay ng iba pang mamamayan.

Batay pa rin sa pahayag, ang CAA ay dikta ng IMF-World Bank sa guberno. Ang mga imperyalistang bansa na magbebenta ng kanilang sobrang produkto — ng mga *four-stroke engine*, bagong timplang langis, mga makina at pyesa ng sasakyan — ang tunay na makikinabang sa implementasyon ng CAA. Tutubo naman nang limpak-limpak ang IMF-WB sa uutangangin ng rehimeng Macapagal-Arroyo para ipambili ng makinarya na kailangan sa *smoke emission testing* at iba pa na tinatayang nagkakahalaga ng P25B.

Samantala, hinaras ng PNP ang mga kalahok at tagasuporta ng tigil protesta. Pinigil ng mga pulis ang mga drayber sa Calumpit na pumunta sa Malolos Crossing para dumalo sa rali at misang bayan doon. Sinamsam ang lisensya ng ilang traysikel drayber na nasa Malolos Crossing at pinigil ang martsa ng ilang manggagawa ng EXPO patungong Kapitolyo. Winarningan ng mga pulis ang mga raliyista sa Mecauyan na hindi sila papayagang makapunta sa Malolos Crossing. Sadyang ayaw papuntahin ng mga pulis sa Kapitolyo o malapit dito ang mga kalahok sa tigil pasada lalu't ang selebrasyon ng birtdey ni Gov. Josie de la Cruz ay sa Centro Escolar University ginanap. Sa San Rafael naman, tinakot ng pulisya ang mga opisyal ng JODA (Jeepney Operators-Drivers Association) at TODA (Tricycle Operators-Drivers Association) na huwag lumahok sa tigil-pasada. Hinaras din ang mga opisyal ng JODA at TODA sa Marilao.

Inilunsad din ng mga drayber at iba pang raliyista ng magkakahiwalay na programa-rali sa Mecauyan Crossing; sa Bocaue Crossing/Palengke; sa Baliwag Glorietta; sa St. Paul, Oriente at sa tapat ng munisipyo ng San Miguel; sa Plaridel Crossing; at sa Tabang, Guiguinto. May inilunsad ding magkakahiwalay na Misang Bayan para sa Kabuhayan at Kapayapaan sa St Paul Sta Maria at sa St. James the Apostle Parish sa Plaridel. *H*



69 KVA Transmission Line, Tinutulan ng Mamamayan

Apat na raan at labing walong pamilya mula sa Barangay Sta. Lucia, San Isidro at Sta. Lucia Resetelment ng Magalang, Pampanga ang mapipinsala at malamang na mapalayas sa pagtatayo ng 69 KVA (kilovolt -ampere) *transmission line*. Ito ang magsusuplay ng kuryente para sa pribadong kumpanyang Trust International Paper Corporation (TIPCO) na matatagpuan sa Mabalacat, Pampanga.

Ang mahigit sa P200 M proyektong ito ng National Power Corporation (NaPoCor) ay nakakontra sa kumpanya nina Ruel Murakami at Romulo Kintanar, samantalang tumatayong *sub-contractor* si Rodolfo "Bilog" Salas.

Noong Marso 2002 sinimulan ang naturang proyekto. Sa orihinal na plano, ang ruta ng *transmission line* ay sa labas ng resetelment at bibilhin ang mga *right of way* para sa mahigit 40 poste ng kuryenteng itatayo. Pero dahil makatitipid ang mga kontraktor nang mahigit P40 M, idadaan na lang ang *transmission lines* sa loob ng resetelment at sa ibabaw ng bahayan.

Nagsimulang magtayo ng mga poste sa loob ng resetelment nang walang anumang abiso at pampublikong pagdinig mula sa mga naninirahan. Noong una, sinabi ng mga kontraktor na ang mga poste ay para sa 13.8 KVA *main line* ng Pampanga Electric Cooperative (PELCO). Nang makita ng mga naninirahan na mas matataas ang mga posteng itinayo, nagduda na sila kaya sinimulan nila ang pagsisiyasat. Napag-alaman nila na ito ay hindi mga poste ng PELCO katulad ng naunang nabanggit

kundi mga poste ng Napocor. Kaagad na ikinampanya ng mga naninirahan na ang proyekto ay salot sa mamamayan at magdudulot ng iba't ibang sakit tulad ng *leukemia* o kanser sa dugo ang mga *electromagnetic fields** nito.

Dahil sa bumubwelong pagtutol ng mga naninirahan, naobligang makipag-dayalog nang sumunod na buwan ang Housing and Urban Development Coordinating Council (HUDCC)-Pampanga Project Management Office (PPMO) sa pamumuno ni Flordeliza Arrozac. Kasamang nakipagharap ang mga kontraktor na sina Murakami at Kintanar at iba pang nagpakilalang mga dating NPA tulad ni Dado Magpayo. Ngunit matatag na nanindigan ang mga naninirahan at di pinayagan ang pagtatayo ng mga poste. Mabilis na bumaling sa panunuhol ang mga kontraktor nang mabigo ang panlilinlang at pagpapanggap ng mga dating NPA sa pamumuno ni Kintanar na ilusot ang kanilang mapaminsalang proyekto. Sinuhulan ang mga Kapitan ng Barangay Sta. Lucia at San Isidro at ang *homeowner's association* na agad namang gumawa ng resolusyon na sumusuporta ang barangay sa proyekto.

Nang mapasakamay ng mga kontraktor ang sinasabing resolusyon, kaagad na itinayo ang mga poste. Subalit mahigpit na tinutulan ito at agad na nagbarikada ang mahigit sa 1,500 residente sa lugar. Dito na pumasok at nagyabang ang isa pang dating NPA na si "Bilog" sa pakikipag-negosasyon at katulad ng dapat asahan ay nabigo siya

sa pagpapahupa at pangungumbinsi sa mga nagprotestang mamamayan.

Buwan ng Mayo, muling nagbarikada ang mga naninirahan. Nagresulta ito sa pansamantalang pagtigil sa pagtatayo ng mga poste. Dito na pumasok ang pagsuporta ng Konseho ng Magalang at Pamprubinsyang Konseho ng Pampanga sa proyekto. Nang sumunod na buwan, muling sumubok magtayo ng mga poste subalit mas matatag at mas malaking barikada ang itinugon ng mga militanteng naninirahan sa lugar. Nagrali rin sila sa Kapitolyo ng Pampanga upang ipaabot ang kanilang maring pagtutol sa nasabing proyekto.

Buong tapang na pinaninindigan ng mga naninirahan na di maaaring magtuloy ang proyekto at walang ibang maaaring magbigay ng permiso sa proyekto kundi ang mga naninirahan sa lugar.

Ang mahigpit na pagkakaisa at militanteng paglaban ng mga naninirahan ay nagbunga ng muling pagbabalik sa dating ruta sa labas ng resetelment ng proyektong 69 KVA *transmission line*. H

**Electromagnetic Fields (Emf)*-ang enerhiya at pwersang lumilikha ng kuryente ng mga *power* at *transmission lines*. Ayon sa isinagawang pag-aaral ng mga *scientists*, ang 60 hertz *powerline* ng may katulad na *frequency* ng tipikal na *powerlines* sa mga opisina, gusali at mga bahay ay lumilikha (generate) ng malakas na umiikid na emf. Ito ay nagreresulta sa mabilis na paggalaw ng mga selyula sa katawan ng isang pinag-aralang daga. At habang tumataas at tumatagal ang eksposyur nito sa emf ay mas nagiging abnormal ang mga galaw ng selyula at kalaunan ay sumira sa *immune system* ng daga. Ito ang tinutukoy na pagbabagong posibleng magresulta ng *leukemia* sa taong malapit at matagal na nalalantad sa emf.

Anti-Bush War rali, inilunsad sa GL

MARIING ipinanawagan ng Bayan-Gitnang Luzon sa mamamayan ang pagtutol at paglaban sa panggigipit at nakaambang pagsalakay ng Imperyalistang US sa Iraq. Sa ginanap na rali sa harapan ng Clark Airbase sa Angeles nitong Enero 31, tinukoy ni Ka Roman Polintan tagapangulo ng Bayan-GL, na ang mga tropang Kano na narito sa bansa ay naghihintay lamang sa kagyatang mobilisasyon sakaling matuloy ang panggegera ni US President George Bush. Aniya pa, “Hindi lamang mga inosenteng Iraqi ang mapapahamak sa nakaambang giyera kundi ang buhay at kaligtasan ng 1.7 milyong *Overseas Filipino Workers* sa Gitnang Silangan. Bukod pa sa di na rin nila masusustentuhan ang kanilang mga umaasahang pamilya na narito sa bansa.”

Binanggit naman ng tagapagsalitag Ayta na mas lalo pang lumalala ang mga pandarahas sa mga katutubong Ayta. Aniya pa, “Higit na dumarami ang mga paglabag sa mga karapatang-tao ng mga katutubo sa tuluy-tuloy na pagdaraos ng mga magkasanib na pagsasanay-militar ng mga tropang Kano at Pilipino sa aming lupang ninuno.”

Sa kasalukuyan ay nasa bansa ang mahigit 6,000 libong tropang Kano para sa magkasanib na pagsasanay-militar sa ilalim ng Balance Piston 03-05.

Ayon sa pahayag ng Bayan-GL, “Ang imperyalistang US ang kauna-unahang gumamit ng bomba atomika na inihulog nito sa Nagasaki at Hiroshima sa Japan

bago matapos ang World War II.” Ang US rin ang gumamit ng mga malalakas na armas na panlipol tulad ng bombang Napalm at sandatang kemikal tulad ng Agent Orange na kapwa kumitil sa milyun-milyong mamamayang Vietnamese sa giyerang pananalakay nito sa Vietnam noong dekada sienta at sitenta.

Matapos ang programa sa Clark, nagpalipad ng mga puting lobo na may nakakabit na PEACE ang mga lider ng delegasyon bago lisanin ang dating base. Nagtuloy ang mga raliyista sa Plaza Miranda at duon sumanib sa nakapiket na mahigit isang daang guro at estudyante ng Holy Family Academy na mariin ding tumututol sa planong pananalakay ng Imperyalistang US. *H*



Mga taong simbahan, nanawagan ng Kapayapaan



PINAMUNUAN ng Promotion of Church People's Response (PCPR) ang isang misang bayan sa Nepo Quadrangle, Angeles City nitong Pebrero 28. May 200 katao mula sa iba't ibang militanteng organisasyon ang lumahok sa misang kumukundena sa bantang pananalakay ng Imperyalistang US sa Iraq at nanawagan ng kapayapaan para sa buong mundo.

Ayon sa pahayag ng PCPR, “Hindi makatarungan ang giyerang ilulunsad ng US sa Iraq sapagkat ibubulid nito sa panganib at matinding kapighatian ang milyun-milyong inosenteng sibilyang Iraqi”. Gayundin, mariing nilang kinukundena ang todong suportang ibinibigay ng rehimeng Gloria Macapagal-Arroyo sa pamamagitan ng pagpapahintulot sa US na gamitin ang bansa bilang lunsaran ng giyerang pananalakay nito sa Iraq. *H*

Pamilyang Aeta minasaker ng militar sa Zambales

MATAPOS ang isang labanan sa pagitan ng 24th IB at Bagong Hukbong Bayan (BHB) nitong Pebrero 1 sa Barangay Cabauatan, Botolan, Zambales, walang awang minasaker ng mga pasistang militar ang anim kataong pamilyang Aeta sa Sityo Palis, Barangay Magisgis, Botolan, Zambales. Naghasik din ng karahasan ang mga kaaway sa kanugnog na Sityo ng Nakolkol.

Ayon kay Jose Agtalon, tagapagsalita ng Josefino Corpuz Command, napatay sa laban

ang 10 militar at maraming pwersa nito ang sugatan kaya galit na binalingan ng pasistang militar ang mga napaghihinalaang tagasuporta ng BHB. Pinabulaanan din niya ang mga naunang pahayag ng Northern Luzon Command (Nolcom) na dalawa lamang sa mga tropang militar ang nasawi habang 18 naman di umano ang napaslang na mga Pulang Mandirigma. Ayon pa kay Agtalon, isang Pulang Mandirigma lang ang naging martir sa labanan. *H*

(Pagpaparusa... mula pahina 12)

patahimikin ang Kilusang lumalaban at nakikibaka sa kanilang pagsasamantala. Samantalang si Sek. Nilo ay sadyang nakipagkaibigan sa inaakala niyang mga lider ng Kilusan upang gamitin o isangkalan sa pagkakalat ng intriga na siya/sila diumano ay pinapahintulutang mag-*quarry* ng mga Kasama kapalit ang suhol na siya mismo ang kumukulimbat at ipangalandakang iyon aniya ay “rebolusyonaryong buwis”.

Nais naming ilinaw na ang patakaran ng kilusan sa pagbubuwis ay sumasaklaw lamang sa mga lehitimong negosyo. Hindi namin binubuwisan ang mga mapaminsalang negosyo tilad ng huweteng, *beerhouse* o putahan, pasugalan at iba pa. Bagkus, pinamumunuan namin ang paglaban dito.

4. Kapwa sila may pagkakautang na dugo sa mamamayan. Si Sek. Nilo ay may indirektang pananagutan sa mga namatay sa Ilog-Angat dahil sa pagkalunod (hindi natural na pagkalunod dahil sa ang mga biktima ay karaniwang dumaosdos lamang sa malalalim na hukay na nilikha ng *quarry*) at pagkagutom ng libu-libong mga magsasakang nawalan ng balong ng tubig sa kanilang sakahan. Samantala, si Dante Marcial naman ay tahasang gumamit ng kanyang armadong tauhan (private army) upang pumatay at magpapatay ng sinumang humahadlang sa kanilang negosyo/sindikato. Ilan sa kanyang pinatay o pinapatay ay ang dating Kapitan ng Sibul na si Totoy Mangalindan, ang lider-

masa at konsehal ng Sibul na si Gemo Mananghaya, ang sarili niyang byenan na si Abeng Santos, Milio Tolentino at iba pa


5. Sa huling pagsusuri, dahil kapwa sila nahatulan ng Hukumang bayan ng maksimum na kaparusahan ay tiyak na hindi nila magagamit na pangsuhol sa Rebolusyonaryong Gubyerno ang milyun-milyon nilang kayamanan para baligtarin ang kapasyahan ng mamamayan.

DAPAT NA MAGSILBING BABALA SA IBA PA NILANG MGA KAURI ANG MASAKLAP NA KINAHINATNAN NINA SEK. NILO SANTOS AT DANTE MARCIAL!

Panlarangang Pamatnugutan sa Operasyon
BAGONG HUKBONG BAYAN - NPA

Komite ng Larangang Gerilya
PARTIDO KOMUNISTA NG PILIPINAS - CPP

Silangang Bulakan
25 Pebrero 2003





Pagpaparusa kina Sek. Nilo Santos ng Angat at Dante Marcial ng San Miguel, 2 multi-milyonaryong opereytor ng sindikato sa *quarry*

Magkasunod na naigawad ang parusang kamatayan kina SEK. NILO SANTOS (kasalukuyang gumaganap bilang Municipal Planning & Development Officer – MPDO sa bayan ng Angat) at DANTE MARCIAL ng Sibul, San Miguel, Bulacan. Ang maksimum na kaparusahan ay ibinatay sa hatol at kapasyahan ng Hukumang Bayan dahil sa mga nagawa nilang mabibigat na krimen laban sa mamamayan at sa Rebolusyonaryong Kilusan.

May ilang pagkakahawig o komun na sirkumstansya na kapwa makikita kay Sek. Nilo at Dante:

1. Kapwa nakapagkamal ng yaman at naging mga multi-milyonaryo ang dalawang ito sa pamamagitan ng perhuwisyong negosyo o sindikatong ipinundar sa kani-kanilang lugar, ang operasyong pagku-*quarry*. Si Sek. Nilo ay tumipak ng malaki sa sand *quarry* sa Ilog-Angat samantalang si Dante Marcial ay nakapaghari sa kanyang lugar dahil sa kinamal na yaman mula sa *marble quarry* sa Bundok Mabio.

Kapwa sila kinasusuklamang sa kanilang mga lugar dahil sa pagkamanhid nila sa idinadaing na

mga reklamo't kahilingan ng mamamayan. Ang kanilang mga negosyo ay walang-habas na pumipinsala sa buhay at kabuhayan ng mamamayan lalo na sa mga magsasakang natutuyuan ng tubig-panghalaman at mga residenteng nawawalan ng balong para maigiban ng matinong tubig-inuminan.

Pinapatunayan ng mga independiyenteng mananaliksik sa geolohiya na ang tuloy-tuloy na pagpapasabog at pagtibag ng mayaman sa mineral na mga batong nakaimbak sa Bundok Mabio sa San Miguel – DRT at walang-humpay na ekstraksyon ng graba't buhangin sa Ilog-Angat ay nakapipinsala ng malaki sa "water table" na pangunahing imbakan ng tubig lalo na sa panahon ng tag-tuyot.

2. Kapwa sila may kasosyong mga bigating burukrata-pulitiko at kapwa protektado ng mga timawang pulisya't militar. Kung si Sek. Nilo ay nagagamit ang tungkulin niya sa munisipyo kasapakat sina Mayor de Leon at Bokal Rivera, si Dante naman ay may Gobernadora Josie dela Cruz na pakubling nakikiparte sa kitang-sindikato sa pamamagitan ng kanyang asawang si Engr. Roger dela Cruz. Kapwa naka-*payroll* sa kanila ang mga taga-DENR, taga-DAR, lalo na ang mga upisyal ng PNP at AFP na nakabase sa Camp Tecson sa Tartaro, San Miguel at Sampaloc, San Rafael.
3. Kapwa sila "nakikipaglaro" sa mga Kasama sa Rebolusyonaryong Kilusan sa layuning kumuha rin ng proteksyon para sa kanilang perhuwisyong negosyo ngunit kapwa sila nabigo. Si Dante ay patuloy na nag-alok ng kanyang salapi sa kanang kamay para diumano "makatulong sa Kilusan" habang ang kaliwang kamay ay nagtutustos sa magastos na operasyong militar para durugin at

(sundan sa pahina 11)

Erratum:

Ang tulang "Sa Burol Ko'y 'Wag Lumuha Sapagkat Ako Duo'y Wala" na lumabas sa Hulyo-Agosto 2002 Regular na isyu ng Himagsik ay sinulat noong 1995 ng isang kasamang dating kumilos sa hanay ng kabataan-estudyante (KE). Hindi si Eduardo "Ka Bikol" Antonio ang sumulat ng tula; humingi lamang siya ng kopya nito sa taga-KE. Nagbilin naman si Ka Bikol sa kanyang anak na kapag siya'y namatay, basahin ang tula sa kanyang burol. Naipagkamali na siya ang sumulat ng tula.

Nitong Pebrero ay pinaabutan kami ng isang kasamang dating nasa-KE tungkol sa pagtutuwid.

Mga Istap ng Himagsik